



KEMENTERIAN KERJA RAYA
MALAYSIA

KENYATAAN MEDIA

MAJLIS PENYERAHAN PROJEK MENGGANTIKAN JAMBATAN SEDIA ADA DI TEMERLOH, PAHANG

TEMERLOH - Kerajaan Persekutuan melalui Kementerian Kerja Raya (KKR) meneruskan usaha melaksanakan projek-projek berimpak tinggi kepada rakyat, dengan menyediakan kemudahan jalanraya yang selesa dan selamat. Ini antara lain ialah dengan siapnya dua projek menggantikan jambatan di kawasan Temerloh, Pahang yang terletak dalam jajaran Jalanraya Persekutuan di Negeri Pahang.

Projek tersebut adalah projek menggantikan jambatan sedia ada FT098/002/20 Temerloh, Pahang (Sungai Semantan) yang mula dibina pada 1 Ogos 2016 dan telah siap pada 15 Januari 2019. Projek ini menelan kos sebanyak RM15.6 juta dan direkabentuk secara dalaman oleh JKR. Kontraktor untuk projek ini ialah syarikat Tegap Padu Sdn. Bhd. dengan skop projek adalah penggantian jambatan sedia ada dengan jambatan baharu sepanjang 100 meter dengan piawaian R5 dan pengalihan utiliti. Penyerahan projek ini telah disempurnakan oleh Timbalan Menteri Kerja Raya, YB Tuan Haji Mohd Anuar Mohd. Tahir dalam satu majlis di Temerloh hari ini.

Satu lagi projek yang telah siap di Temerloh adalah Projek menggantikan jambatan sedia ada FT002/196/50 Temerloh, Pahang (Sungai Kawang) sepanjang 40 meter dengan piawaian R5. Projek bernilai RM8.9 juta ini mula dibina pada 1 September 2016 dan siap pada 31 Ogos 2018. Syarikat perunding Aziz Sehu telah merekabentuk projek ini dan kontraktor yang dilantik menyiapkan projek ini ialah Syarikat Saznoor Industries Sdn. Bhd. Selain daripada menggantikan jambatan, skop kerja juga meliputi kerja-kerja membaikpulih jalan raya sedia ada dan pengalihan utiliti.

Kedua-dua projek ini merupakan projek yang diluluskan dalam Rolling Plan 3 (RP3) 2014, Rancangan Malaysia Ke-10 (RMke-10). Pembinaan jambatan ini bertujuan bagi menggantikan jambatan sedia ada yang telah lama dibina iaitu Jambatan Sungai Semantan pada tahun 1960 dan Jambatan Sungai Kawang pada tahun 1955 yang tidak lagi sesuai dengan isipadu trafik pada masa kini. Selain itu ia berupaya meningkatkan tahap keselamatan dan keselesaan pengguna disamping melancarkan aliran trafik di sekitar Temerloh.

Selain daripada projek penggantian dua buah jambatan ini, terdapat dua lagi projek dibawah Kementerian ini di Daerah Temerloh iaitu Projek menggantikan jambatan sedia ada FT098/030/00 di Kuala Krau yang bernilai RM14.93 juta yang dalam peringkat pembinaan (kemajuan semasa di tapak: 60%) dan Projek Menaiktaraf Jambatan Sultan Haji Ahmad Shah (Jambatan Kedua Temerloh) daripada 2 lorong kepada 4 lorong bernilai RM160 juta yang kini dalam peringkat rekabentuk.

KEMENTERIAN KERJA RAYA
17 JANUARI 2019

Dikeluarkan oleh:

Unit Komunikasi Korporat | Kementerian Kerja Raya Malaysia

☎ : 03- 8000 8000 / D.L :03-2771 4616 / 4627 | 📠 : 03-2711 1101

Laman Web : www.kkr.gov.my | [Kementerian Kerja Raya](https://www.facebook.com/KementerianKerjaRaya) | @MOWorks | Pro@kk.gov.my